

Seniorereis 29. Mei 2018

Am Morge het der Petrus no nid grad es fründlichs Gsicht zeigt. Das het üsi Reiseluscht nid chönne trüebe. Nach däm das a verschidene Orte di Froue u Manne si igschtige u es Plätzli hei gfunge het die Reis chönne los go. Die 36 Pärsonen si vom Chauffeur Hanspeter Blaser vo der Summer AG Grünen u der Susann Rothenbühler begrüest worde. Wo üsers Reiseziel isch heimer gwüst. Aber wie chöme mir dört häre? Richtig Häusernmoos Oeschenbach si mir uf Langenthal cho. Bis dert isch d Strecki scho bekannt gsi. Aber jetz hets du anders usgse. Autobahnfahrt het es hüt keni gä. Über St. Urban u Reidesimer i Kanton Luzärn cho. Gli einisch si mer uf Aargouer Bode u Schöftland zue. Richtig Reinach Menziken Beromünster chöme mir wider zrug i Kanton Luzärn. D Ussicht uf e Baldeggersee isch wunderbar. Jetz si mir a üsem Reiseziel Herlisberg acho u dert vom e fründliche Gaschtgäber Team erwartet worde. Das feine Mittagässe wo mir dört hei chönne gniesse het aune gmundet. Nach em ässe si die wo chönne hei go d Kapälle aluege wo grad näbe der Wirtschaft gstange isch, oder hei eifach die schöni Ussicht gnosse. S Wätter het sech jetz ou vo der schönschte Site zeigt. Anschliessend hets no e churzi Andacht gä. Der Abschluss vo däm Ufendhaut z Herlisberg het du no es erfrüschends Dessärt gmacht. Wüu s Wätter so schön gsi isch het der Chauffeur nit der diräkt Wäg heizue gno. Über Römerswil Rothenburg Ruswil hei mer Wolhusen erreicht. Jetz bletere mer no chli im gröschte Buech vor Wäut. Dürs Entlebuch chöme mir wider zrug is Emmental. Ou di schönschti Reis geit einisch z Änd. Aui Teilnehmende danke em Chauffeur für die schöni u intressanti Fahrt mit eme Aplous. Em Pfarrer Peter Schwab für e bsinlech Teil vo däm gmüetleche Tag. De Froue vom Froueverein: Theres Hüsler, Susann Rothenbühler, Silvia Schwarzentrub u Barbara Züttel ganz es grosses Merci u Bravo. Eso si mer du ou wider mit viune schöne Erinnerige a dä Tag im Heimisbach acho. Aune wo derbi gsi si gueti Gsundheit u churzi Zit bis es im nächschte Johr de heisst «Seniorenreise 2019» Wo häre geits ächt?